

肥鄉縣志卷之六

山川

山橫北郭險阻憑依水繞東城江河襟帶自來邑都之建置悉借形勢之雄奇氣鍾造物之靈概擅方輿之勝而肥則平原曠野雖擅膏腴巨浸懸巖難資控扼然名標隻嶺嫵奇秀於天臺割降洪流慨懷襄於漳水德不在險嵯峨無取乎高峰安不忘危原委必詳夫故道志山川

天臺山在縣西十五里土山無石高數丈盤結數百步漳水湮沒基址陵夷

浮邱山在縣南四里名勝志浮邱山土阜高平地數尺

山子邱在縣東四十里僅存其名

漳河源有二清漳發源山西平定州樂平縣沾巔濁漳發源山西路安府長子縣發鳩山漢書地理志上黨郡沾嶺大睪谷清漳水所出長子縣鹿谷山濁漳水所出二水分流至河南彰德府東南涉縣合爲一曰交漳口自此而上爲漳上流歷久不變東行二里入磁州西南境磁州而下遷徙不常歷代以來或亂於河通典河水橫流入漳是也或塞於衛元史河渠志漳水潰溢衛不能通是也至明則挾滏陽而北徙外史河渠志漳自永樂九年與滏陽合流是也 清康熙二十三年河身南徙復與滏分與衛

肥鄉縣志

卷六 山川

合漳水所經略辨河形而已

自唐以瀕漳苦溢縣令韋景駿築隄障之其故道不可考明成宏間由成安東北流入境距城東六里嘉靖十七年徙入於衛隆慶三年決鄆米堤在鄆浸城數年復南徙萬歷間又徙縣西及前清順治二年徙縣東康熙四年秋七月水注城雨急浪奔地陷爲沼五年僑治郡城皇華館六年移治舊店營水既久距縣境凡田疇廬舍俱沒於巨浸惟西北有余公河洩水得無恙 漳河故道有自廣平入境者河頭堡村北東行至韓旺南折而北至東漳堡東賢店張家橋等村皆其支流也北岸有廢隄尙存有自邯鄲入境者辛安鎮東北行人永年境卽鄆米口下流也有自成安入境者則縣東河身也由張達至王固則余公河故渠也而天臺山西亦有枯渠大抵合縣未有不罹其災者

邯水經注發源邯山東北經邯會故城西北注漳水

澄湖水經注漳水又東北通澄湖

邯溝水經邯溝故城東又經肥鄉故城北與白渠合東經列入入漳

與邯水不同故兩志之

余公河柳林滏陽水溢縣西北民甚苦之知縣余炯鑿河以洩其患故名

有記賦詳藝文

石家河 在縣東五里漳水支流

黃河故道府志肥鄉亦古黃河故道所經

古白渠水經注白渠水出魏郡武安縣欽口山東南流經邯鄲縣又東經列人右會漳津地理志白渠東至列人入漳是也

肥鄉縣志

卷六 山川

二